



Bain zuppads en quels trais mats, (da san.) Fadri Arpagaus, Nevio Beer e Paulo Genco.



Stadas al di dal militar èn er quellas trais mattas sursilvanas. (da san.) Alina Caminada, Leoni Mirocha e Sina Mara Candinas.

## «Mir nach: Marsch!»

Pass da vacanzas: visita tar il militar

DA GION NUTEGN STGIER / ANR

■ Per in di ha la scola da recrut «Inf RS 12» a Cuira gi 120 ulteriurs recruts. La raschun è stada che 120 uffants dal Pass da vacanzas da tschintg lieus han fatg ina visita al militar. Il cumond dal di è stà fitg vast. Visità ils detaschaments ha er Daniel Steiner, il cumandant da la scola da recrut. Normalmain visitan participantas e participants dal Pass da vacanzas da la Pro Juventute ina banca, in spital, Radiotelevisiun Svizra Rumantscha ubain er ils pompiers. Els fan lura er curs d'ir cun bike, da rampagnar, lavurar cun laina e schizunt da cuschnar. Cumplettain tut insatge auter è lura la puschida nua ch'ils uffants da l'emprima enfin la 6. classa han la chaschun da visitar per in di la scola da recrut a Cuira, la «Inf RS 12». Dalla partida essan er nus stads, quel di ch'il dumber dals recruts è s'augmentà per intginas uras dad 800 sin 920 d'els.

### Retrair vestgi e chapè

Al plaz da la caserna èn ils uffants da la Cadi, da Domat, Razèn, Surses e da la Val Alvra vegnids beneventads da major dal stab general Rolf Brülisauer, il cumandant substitut da la scola da recrut. Sco emprim han las mattas ed ils mats gi da retrair vestgi e chapè per far buna parada e per esser recruts sco che tutga. Suenten en ils uffants sa divertids cun exercitar da salidar correct, salidar cun il maun dretg, e na cun il sanester, per esser in dretg recrut e schuldà. Tut auter che funcziunà ha lura il star en colonna a duas, e quai be mo al cumanzament dal di, mabain fin tar la relaschada. Tar mintga cumond: «Mir nach, Marsch», dal sergent ha bain in ubain l'auter ditg: «oh Dieu», en il decurs da l'avantmezdi lura s'endià a quel tun. Fatg impressiun als 120 uffants ed er als manaders e las manadras dal Pass da vacanzas ha lura la disciplina dals «vairs»



En versaquants onns è la recruta per els trais er realitad. (da san.) Gion Elia Huonder, Livio Cajöri ed Alessio Cugnach.

recruts ed er lur urden en chombra. Surtads eran ils mats e las mattas che en tuttas chombras han els vesi nagina televisiun. In tgit en cuschna han ils uffants er pudì dar e lura ha il sergent er mussà il local d'arrest. Dumandà han els bain perge ch'in recrut haja insumma d'ir en parschun e quant dis ch'el restia en quella rusna? Cun vesair la stanza d'arrest èsi en in culp vegni pli quiet. Activs èn ils uffants vegnids tar il post da sanitad nua che tuts han gi ina buna instruiziun dals recruts da sanitad.

### Gentar en cuminanza

Tenor il cumond dal di era il gentar fixà sin las 12.00. Sin quel sa legravan ils participants e las participantas dal Pass da vacanzas gist uschè fitg sco ils 800 recruts. Mangià han ils uffants en cuminanza e gi da star han els en colonna. Per in mument èsi vegni calm cun cumparair Daniel Steiner, il cumandant da la scola da recrut sin il champ da gentar. Cun el sez esser bab d'intgins uffants ha el prendì bier temp per ils ses pli giuvens recruts. Bainspert ha mintgin dals 120 uffants gi

damain respect dal colonel dal stab general. Gugent ha Daniel Steiner er da pled e fatg a ses visitaders ed er gi grond plauschiar che tants uffants han mussà interess per quel di tar il militar. Suenten gentar ha mintgin gi la chaschun da scriver ina carta a ses geniturs, quella ha natiralmain retschet il bul da la posta militar.

### Il punct culminant dal di

Cuntinuà ha l'expediziun militar lura per ils 120 uffants cun ir da l'arsenal al Rossboden cun intgins chars armads da la marca Piranha e cun schenummads Duros. Sin l'areal da tir e d'exerciziun vegnidas fargas cun ils vehichels da militar intginas rundas. Per mats e mattas èn quels girs stads il punct culminant dal di. Mats e mattas, omaduas han gi in vair «gaudi» da girar per il «Rossboden» enturn cun cuntanscher ils vehichels ina pulita sveltezza. Cun avisar la partenza è il di i a fin, in di che resta segir en memoria fin quel di che la scola da recrut cumenza pir dretg per ils participants dal Pass da vacanzas e forsa er ina da las mattas.



Petra Pally (dretg) ina da las manadras dal Pass da vacanzas Cadi en discurs cun Daniel Steiner (en pais) il cumandant da la scola da recrut Cuira.



L'atraziun dal di: ir cun ils differents vehichels da militar sco cun quel «Piranha».



Han er tramess a chasa ina carta postal. (da san.) Ivan Flepp e Lauro Schmed.



Ina gruppa mats e mattas da la Val Alvra.



En il chagliom èn intgins mats er ids durant il di.

FOTOS G. N. STGIER